

---

## Etholiad Cyffredinol 2017

Ebrill 2017

---

### Nodiadau ar Ganllawiau Rhaglenni S4C

#### 1. Rhagarweiniad

1.1 Caiff Etholiad Cyffredinol y Deyrnas Unedig ei gynnal ddydd Iau, Mehefin 8<sup>fed</sup> 2017.

Yn y cyfnod yn arwain at yr etholiad, atgoffir cynhyrchwyr o'r angen i sicrhau cydymffurfiaeth â:

- Chanllawiau S4C ar Gydymffurfiaeth Rhaglenni, Gwrthdaro Buddiannau a Diddordebau Gwleidyddol (Canllawiau S4C ar Gydymffurfiaeth Rhaglenni);
- Chod Darlledu Ofcom (yn enwedig adrannau 5 a 6, a'r Arweiniad i adran 6); a
- Chanllawiau S4C ar Etholiadau Llywodraeth Leol Cymru 2017 (yn ystod cyfnod yr etholiadau hynny, sef hyd at ddiwedd Mai 4<sup>ydd</sup> 2017).

1.2 Noder fod Ofcom wedi cyhoeddi yn ddiweddar eu penderfyniad i ddiwygio Adran 6 (etholiadau a refferenda) y Cod Darlledu i gael gwared ar y cysyniad o 'bleidiau mwy' (gweler [yma](#) am ragor o wybodaeth). Daeth y newidiadau hyn i rym ar 22<sup>ain</sup> Mawrth 2017. O'r dyddiad hwn, rhaid i gynhyrchwyr seilio penderfyniadau golygyddol ynghylch sylw mewn etholiadau ar dystiolaeth o gefnogaeth mewn etholiadau blaenorol a/neu gefnogaeth bresennol. Er mwyn helpu gyda'r broses benderfynu, mae Ofcom wedi cyhoeddi crynodeb blynyddol o gefnogaeth etholiadol blaenorol (gweler [yma](#)) sy'n rhestru'r ffactorau y bydd yn eu hystyried wrth wneud penderfyniadau ym maes etholiadau (gweler isod am ragor o wybodaeth).

1.3 Disgwylir i gynhyrchwyr felly sicrhau eu bod wedi darllen a deall y Cod Darlledu a'r Arweiniad diwygiedig, a dylid sicrhau cyngor cyfreithiol annibynnol lle bo angen.

1.4 Mae'r nodiadau hyn yn cynnig canllawiau ychwanegol wrth weithredu'r gofynion hynny. Dylai cynhyrchwyr gyfeirio unrhyw ansicrwydd am weithredu'r canllawiau at y Comisiynydd Cynnwys perthnasol yn S4C yn y lle cyntaf. Mae nifer o'r canllawiau isod yn berthnasol at y cyfnod cyn yr etholiad yn ogystal â'r cyfnod etholiad ei hun.

#### 2. Cyfnod Etholiad ac Ymgeiswyr

2.1 Mae'r cyfnod etholiad swyddogol ar gyfer yr Etholiad Cyffredinol yn cychwyn ar ddyddiad diddymu Senedd y DU ac yn parhau tan fydd pleidleisio'n gorffen. Bydd cyfnod yr Etholiad Cyffredinol yn cychwyn am 00.01 ddydd Mercher 3<sup>ydd</sup> o Fai 2017 ac yn gorffen am 22.00 ddydd Iau 8<sup>fed</sup> o Fehefin 2017.

2.2 Mae 'cyfnod etholiad' yr Etholiad Cyffredinol (3 Mai – 8 Mehefin) a 'chyfnod etholiad' yr Etholiadau Llywodraeth Leol (27 Mawrth – 4 Mai) yn gorgyffwrdd. Felly rydym eisoes mewn cyfnod o sensitifrwydd gwleidyddol o ran cynnwys rhaglenni S4C. Trwy gydol y cyfnodau a nodir uchod, rhaid i gynhyrchwyr roi gwybod i S4C o flaen llaw am gynlluniau i gynnwys gwesteion yn eu rhaglenni sydd â chysylltiad amlwg ag unrhyw blaid

wleidyddol, neu sy'n debygol o fod yn ymgeisydd yn yr Etholiad Cyffredinol (a hyd at y 4<sup>ydd</sup> o Fai, yn ymgeisydd yn yr Etholiadau Llywodraeth Leol). Mae hyn eisoes mewn grym a bydd yn parhau'n berthnasol i gynnwys S4C trwy gydol y cyfnodau a nodir uchod (h.y. hyd at ddiwedd yr Etholiad Cyffredinol ar yr 8<sup>fed</sup> o Fehefin).

- 2.3 Mae angen i gynhyrchwyr fod yn gyfarwydd â'r rhestr ddiweddaraf o ymgeiswyr er mwyn bod yn ymwybodol o flaen llaw o broblemau a all godi mewn cysylltiad ag unigolion fydd yn ymddangos yn eu rhaglenni.
- 2.4 Atgoffir cynhyrchwyr bod Canllawiau S4C ar Gydimffurfiaeth Rhaglenni (yn enwedig adran 5) yn cynnwys cyfyngiadau ar wleidyddion neu ymgeiswyr gwleidyddol yn ymddangos ar S4C, pa un ai cyn neu yn ystod cyfnod etholiad. Ar gyfer rhaglenni 'anwleidyddol', disgwylir i bob cynhyrchydd hysbysu S4C ar unwaith os oes amheuaeth y bydd un o'u cyfranwyr, hyd yn oed os yw'r rhaglen wedi ei recordio yn barod, yn sefyll fel ymgeisydd yn yr etholiad. Ni chaniateir i unrhyw ymddangosiadau 'newydd' gael eu trefnu yn ystod cyfnod yr etholiad.
- 2.5 Ni chaniateir i ymgeiswyr weithredu fel cyflwynwyr newyddion, cyfwelwyr na chyflwynwyr unrhyw fath o raglen yn ystod cyfnod yr etholiad. Mae'n hynod o bwysig bod S4C yn cael gwybod mor bell o flaen llaw ag sy'n bosib os oes unrhyw un o gyflwynwyr y sianel yn bwriadu sefyll fel ymgeisydd.
- 2.6 Ni fydd rhestr derfynol yr ymgeiswyr ar gael tan i enwebiadau gau ar ddydd Iau 11<sup>eg</sup> o Fai 2017. Yn y cyfnod tan hynny, bydd angen i gynhyrchwyr fod yn arbennig o ofalus o ran cyfranwyr sydd wedi mynegi bwriad i sefyll yn yr etholiad, neu sy'n debygol o wneud hynny.
- 2.7 Mewn unrhyw adroddiad sy'n cyfeirio at ymgeiswyr cyn i enwebiadau gau, dylid esbonio mai dyna'r rhestr 'hyd yn hyn'. Rhaid i adroddiad o'r fath hefyd gyfeirio, yn y man lleiaf, at restr ar-lein o'r holl ymgeiswyr sy'n sefyll.
- 2.8 Ni fydd unrhyw drafod na dadansoddi materion etholiadol ar ddiwrnod pleidleisio o 00.30 nes bydd y gorsafoedd pleidleisio wedi cau am 22.00. Rhaid i unrhyw sylwadau fod yn rhai ffeithiol yn unig heb unrhyw beth a allai ddylanwadu ar y bleidlais.
- 2.9 Mae S4C am geisio osgoi sefyllfa lle bo rhaglenni neu gynyrchiadau S4C yn cael eu defnyddio at bwrpas ymgyrchu. Yn ystod cyfnod ymgyrchu'r pleidiau a'r cyfnod etholiad swyddogol, ni ddylid trefnu ymweliadau i set neu gynyrchiadau S4C i ymgeiswyr yn yr Etholiad Cyffredinol na'r Etholiadau Llywodraeth Leol (fel sy'n briodol), nag aelodau etholedig eraill. Dylid cydlynu gydag S4C (adran bartneriaethau) cyn gwahodd gwleidyddion i ymweld â chynyrchiadau S4C ar adegau eraill.

### **3. Didueddrwydd a Thegwch**

- 3.1 Rhaid rhoi pwys dyladwy i'r ymdriniaeth o'r pleidiau ac ymgeiswyr annibynnol yn ystod cyfnod yr etholiad. Wrth benderfynu ar y lefel briodol o sylw i roi i'r pleidiau ac ymgeiswyr annibynnol, rhaid i gynhyrchwyr ystyried tystiolaeth o gefnogaeth mewn etholiadau blaenorol a/neu gefnogaeth bresennol. Dylai cynhyrchwyr gysylltu â'r Pennaeth Dosbarthu Cynnwys, Llion Iwan, am arweiniad pellach.
- 3.2 Disgwylir i gynhyrchwyr hefyd ystyried rhoi sylw priodol i'r pleidiau eraill ac ymgeiswyr annibynnol sydd â barnau a safbwyntiau pwysig.

- 3.3 Nid yw hyn yn golygu bod rhaid rhoi'r union faint o amser i bawb na bod rhaid cynnwys pob plaid ymhob eitem, ond rhaid sicrhau didueddrwydd dyladwy a thegwch dros gyfnod yr etholiad ar ei hyd.
- 3.4 Mae Ofcom wedi awgrymu y dylid ystyried y ffactorau canlynol wrth bwysoli'r gwahanol fathau o dystiolaeth wrth wneud penderfyniadau mewn perthynas â sylw ar yr etholiad:
- rhoi mwy o bwys ar berfformiad go iawn plaid wleidyddol mewn etholiadau na data pŵl piniwn. Mae hyn yn adlewyrchu'r ffaith bod perfformiad etholiadol yn fesur o sut mae pleidleiswyr wedi gwneud eu dewis democrataidd mewn gwirionedd. Mae hyn yn cymharu â'r ansicrwydd mwy sydd ynghlwm wrth gefnogaeth mewn polau piniwn, na fydd o reidrwydd yn trosi i bleidleisiau neu seddi mewn etholiad;
  - wrth ystyried cefnogaeth mewn etholiadau blaenorol, dylid ystyried ffactorau fel perfformiad etholiadol pleidiau (gan gynnwys nifer yr ymgeiswyr a gafodd eu hethol a chanran cyffredinol y bleidlais a gafwyd) mewn etholiadau cyfatebol blaenorol dros o leiaf dau gylch etholiadol;
  - dylid ystyried perfformiad mewn etholiadau perthnasol blaenorol a gafodd eu cynnal yr un pryd, yn ogystal â pherfformiad mewn etholiadau blaenorol na chawsant eu cynnal ar adeg benodol;
  - dylid ystyried perfformiad etholiadol pleidiau dros o leiaf dau gylch etholiadol, wrth ystyried perfformiad mewn unrhyw fath o etholiadau. Fodd bynnag, dylid rhoi llai o bwys ar dystiolaeth o berfformiad etholiadol dau gylch etholiadol neu fwy yn ôl wrth ystyried natur hanesyddol y dystiolaeth hon;
  - dylid ystyried dystiolaeth mewn perthynas â gwledydd datganoledig gwahanol y DU;
  - wrth roi llai o bwysau ar gefnogaeth bresennol o'i chymharu â pherfformiad go iawn, dylid rhoi pwys ar dystiolaeth o gefnogaeth bresennol sy'n wrthrychol ac yn fesuradwy. Un math o dystiolaeth wrthrychol a mesuradwy o gefnogaeth bresennol ydy data pŵl piniwn, pan fydd ar gael. Efallai fod mathau eraill o dystiolaeth o gefnogaeth bresennol ond wrth ystyried dystiolaeth o'r fath dylid ystyried cysondeb a gwrthrychedd pob math o dystiolaeth; a
  - dylai cynhyrchwyr bob tro gynnal asesiad cytbwys gan ystyried cyfanswm y dystiolaeth berthnasol.
- 3.5 Caiff y ffactorau sy'n cael eu rhestru ym mharagraff 3.4 uchod eu cynnwys yn addasiad Ofcom o'u Harweiniad i Adran 6, yn ogystal â'u crynodeb blynyddol o dystiolaeth o gefnogaeth flaenorol a/neu gefnogaeth bresennol.

#### **4. Rhaglenni – Pwyntiau Cyffredinol**

- 4.1 Pwrpas canllawiau etholiadol yw sefydlu fframwaith sy'n galluogi cynhyrchwyr a newyddiadurwyr i gyflwyno gwybodaeth mewn ffordd diduedd a thrylwyr, ond i weithredu hefyd mewn amgylchiadau sydd mor rhydd a chreadigol â phosibl.

- 4.2 Mae'n bosib y bydd cyrff etholedig eraill fel y Cynulliad yn parhau i weithredu yn ystod y cyfnod etholiad. Wrth roi sylw arferol i'r rhain, mae angen i gynhyrchwyr fod yn ymwybodol o effeithiau posib hyn ar ymgyrch yr Etholiad Cyffredinol. Dylid gwneud yn glir i'r gwylwyr os yw unrhyw stori yn effeithio ar yr ymgyrch, a dylai cynhyrchwyr fod yn arbennig o ofalus i ddilyn y rheolau didueddrwydd lle bo gwleidyddion nad ydynt yn ymgeiswyr yn traethu ar faterion sy'n berthnasol i'r etholiad, e.e. Cynghorwyr Lleol, Aelodau Senedd Ewrop ac Aelodau Cynulliad.
- 4.3 Wrth drafod unrhyw stori newyddion fawr a all ddigwydd o fewn y cyfnod etholiad, ac yn arbennig canlyniad yr Etholiadau Llywodraeth Leol, rhaid trin unrhyw elfen wleidyddol yn y stori honno mewn ffordd sy'n adlewyrchu'r ffaith ein bod ynghanol ymgyrch etholiadol. Bydd yr union ffyrdd o gyflawni hyn yn dibynnu ar amgylchiadau penodol pob achos.
- 4.4 Mewn achosion lle mae ymgeiswyr yn sôn am ddyletswyddau neu weithgarwch nad yw'n rhan o'r ymgyrch etholiadol, dylai cynhyrchwyr sicrhau nad ydyn nhw'n cael mantais etholiadol annheg dros ymgeiswyr eraill.
- 4.5 Mater golygyddol yw'r drefn y mae pleidiau yn cael sylw mewn rhaglenni neu becynnau, ond mewn cyfres, dylid amrywio'r drefn os yn bosib.
- 4.6 Ni ddylid gofyn am gyfweiliad gydag unrhyw arweinydd plaid, heb ymgynghori gyda'r Comisiynydd Cynnwys perthnasol yn S4C o flaen llaw.
- 4.7 Dylai cynhyrchwyr ymgynghori gyda S4C o flaen llaw hefyd os oes unrhyw fwriad i gynnwys cyfraniad gan wleidydd heb roi cyfle i wleidyddion eraill ymateb.
- 4.8 Dylid osgoi rhoi mantais annheg i unrhyw ymgeisydd, er enghraifft trwy gyfweild unigolion sy'n amlwg yn cefnogi ymgeisydd penodol, neu sy'n gwisgo rhoséd ag enw'r ymgeisydd arni, neu drwy ei holi o flaen posteri neu ddeunydd tebyg sy'n dwyn enw'r ymgeisydd.
- 4.9 Rhaid i gynhyrchwyr ymgynghori gyda S4C cyn trefnu cynulleidfa ar gyfer rhaglen, er mwyn trafod dewis y gynulleidfa a ffyrdd o sicrhau didueddrwydd.

## 5. Rhaglenni Gwleidyddol ac Etholiadol

- 5.1 Rhaid i bob bwletin, rhaglen neu gyfres, yn ogystal â gwasanaethau ar-lein, sicrhau didueddrwydd tuag at bleidiau ac ymgeiswyr, ar draws yr ymgyrch gyfan. Os mai dim ond un rhaglen a ddarlledir, rhaid cyflawni hyn o fewn y rhaglen honno. Mewn cyfres, gellir ei gyflawni ar draws y gyfres gyfan.
- 5.2 Fe ddylai unrhyw gyfres sy'n rhoi sylw i'r etholiad mewn mwy nag un rhaglen atgoffa'r gynulleidfa o gynnwys sydd wedi ei ddarlledu eisoes, ac o gynnwys sydd eto i ddod yn y gyfres, er mwyn ei gwneud yn glir fod didueddrwydd yn cael ei gyflawni dros gyfnod o amser.

## 6. Etholaethau a Rhanbarthau

- 6.1 Rhaid sicrhau didueddrwydd dyladwy mewn adroddiad neu drafodaeth ar etholaethau neu mewn adroddiadau a thrafodaethau ar ardaloedd etholiadol.

- 6.2 Mewn adroddiadau neu drafodaethau stiwdio ar etholaethau, mae'n bosib cynnwys naill ai ymgeiswyr neu gynrychiolwyr y pleidiau. Os yw ymgeisydd yn cymryd rhan mewn eitem ynglŷn â'i etholaeth, rhaid i gynhyrchwyr gynnig cyfle i gymryd rhan yn y fath eitem i'r holl ymgeiswyr o fewn yr etholaeth neu ardal etholiadol sydd yn cynrychioli pleidiau â chefnogaeth etholiadol sylweddol mewn etholiadau blaenorol, neu lle ceir tystiolaeth o gefnogaeth bresennol sylweddol, yn yr etholaeth. Mae hyn hefyd yn berthnasol i ymgeiswyr annibynnol.
- 6.3 Os yw unrhyw ymgeisydd yn methu â chymryd rhan, dylid cynnig y cyfle i gynrychiolydd y blaid yn yr etholaeth, gan esbonio i'r gwylwyr pam fod yr ymgeisydd yn methu â chyfrannu. Lle nad yw'r ymgeisydd yn medru'r Gymraeg, yna gellir cynnig y cyfle i ymgeisydd mewn etholaeth arall neu gynrychiolydd arall y blaid. Os yw'r ymgeisydd neu'r blaid yn gwrthod neu'n methu â chymryd rhan, mae'n dal yn bosib i'r eitem fynd yn ei blaen, ond o ran tegwch, dylid sicrhau fod yr amrywiaeth barn ar bynciau'r etholaeth yn cael eu hadlewyrchu.
- 6.4 Os bydd ymgeisydd yn cymryd rhan mewn rhaglen ar unrhyw fater ar ôl galw'r etholiad, rhaid peidio â rhoi cyfle iddo ef/hi i wneud pwyntiau am yr etholaeth, neu bwyntiau am ardal etholiadol ynghylch yr etholaeth neu ardal etholiadol lle mae ef/hi yn sefyll, os na roddir cyfle tebyg i unrhyw ymgeiswyr eraill. Dylid atgoffa ymgeiswyr sy'n cymryd rhan mewn trafodaethau teledu byw na chaniateir iddyn nhw gyfeirio at etholaethau. Os ydynt yn gwneud hynny, rhaid rhoi stop arnynt ar unwaith.
- 6.5 Rhaid cynnwys mewn unrhyw adroddiad neu drafodaeth ar etholaeth neu ardal etholiadol a ddarlledir ar ôl cau'r enwebiadau restr o'r holl ymgeiswyr sy'n sefyll. Dylai'r rhestr nodi eu henwau cyntaf, cyfenwau ac enw'r blaid y maent yn ei chynrychioli neu, os ydynt yn sefyll yn annibynnol, y ffaith eu bod yn ymgeisydd annibynnol. Rhaid cyfleu hyn drwy sain a/neu lun. Nid yw cyfeirio'r gwylwyr at wefan yn ddigonol yn y sefyllfa hon.

## **7. Rhaglenni Eraill**

- 7.1 Mae'n rhaid i gynhyrchwyr unrhyw raglen 'anwleidyddol' nad yw fel arfer yn trafod materion gwleidyddol neu'n gwahodd gwleidyddion i gyfrannu, ymgynghori â'r Comisiynydd Cynnwys o flaen llaw cyn bwrw ymlaen i drefnu unrhyw gynnwys etholiadol.
- 7.2 Mae pob un o'r canllawiau yn y ddogfen hon yn berthnasol i raglenni o'r fath hefyd.

## **8. Arolygon Barn**

- 8.1 Dylid ymgynghori â'r Comisiynydd Cynnwys o flaen llaw cyn comisiynu unrhyw arolwg barn ar wleidyddiaeth neu faterion cyhoeddus eraill.
- 8.2 Yn ystod y cyfnod etholiad, ni ddylid trefnu unrhyw arolygon barn dros y ffôn, ar-lein, trwy decstio neu drwy gyfrwng arall, sy'n ceisio mesur cefnogaeth i wleidyddion, pleidiau neu bynciau y mae gan y gwleidyddion bolisiau arnyn nhw.
- 8.3 Yn ystod y cyfnod etholiad, ni ddylid darlledu manylion am nifer y galwadau, e-byst, negeseuon testun neu unrhyw negeseuon eraill sy'n cael eu derbyn am unrhyw agwedd o'r ymgyrch etholiadol.

- 8.4 Ni chaniateir cyhoeddi arolwg barn ar unrhyw fater etholiadol ar y diwrnod pleidleisio nes bydd y gorsafoedd pleidleisio wedi cau. Tra bod y bleidlais yn dal ar agor ar y diwrnod hwnnw, mae darlledu unrhyw beth am y ffordd y mae pobl wedi pleidleisio yn drosedd.
- 8.5 Gall gohebwy'r dynnu sylw at arolygon barn mewn pecynnau ac adroddiadau (ond nid pan fo'r blychau pleidleisio ar agor), ond ni ddylid rhoi gormod o bwys iddyn nhw. Mae'n bwysig defnyddio iaith briodol wrth gyfeirio at arolygon barn e.e. mae'r arolwg yn "awgrymu", NID "profi" neu "ddangos".
- 8.6 Rhaid i gynhyrchwyr fod yn arbennig o ofalus gyda 'vox pops' mewn cyfnod etholiad. Rhaid gwneud yn glir nad arwydd o gryfder barn ar bwnc yw cyfweiliadau o'r fath, ond yn hytrach, gyfraniadau sy'n rhoi lliw i ddadl. Rhaid bod yn ofalus hefyd o ran lleoliad y 'vox pops', a sicrhau eu bod yn cynrychioli gwahanol agweddau o ddadl.
- 8.7 Rhaid ymchwilio'n drylwyr i darddiad deunydd a gaiff ei gynnig fel cyfraniadau oddi wrth y gynulleidfa a dylai cynhyrchwyr gymryd cyfrifoldeb dros eu dilysrwydd. Dylid disgrifio cyfranwyr yn glir, yn enwedig lle bo cyfraniadau o'r fath yn dod gan ymgeiswyr.

## 9. Ar-lein a Chyfyngau Cymdeithasol

- 9.1 Mae'r holl ganllawiau ar gyfer rhaglenni teledu yn berthnasol yn yr un modd i holl ddeunydd etholiadol ar y we ac ar y cyfyngau cymdeithasol.
- 9.2 Ni ddylai Wynebau a Phersonél Golygyddol (fel y'u diffinnir yng Nghanllawiau S4C ar Gydymffurfiaeth Rhaglenni) beryglu didueddrwydd neu enw da S4C trwy fynegi safbwyntiau ar faterion gwleidyddol ar wefannau neu gyfrifon cyfyngau cymdeithasol personol. Atgoffir cynhyrchwyr o ganllawiau S4C ar Ddefnyddio Cyfyngau Cymdeithasol i'r perwyl hwn.

## 10. Y Drefn i Ddelio â Chwynion, Sylwadau ac Ymholiadau Gwleidyddol

- 10.1 Nod Cod Ymarfer S4C ar gwynion (<http://www.s4c.cymru/cy/cysylltu--ni/page/17088/sut-i-gwyno-i-s4c/>) yw ceisio sicrhau bod cwynion yn cael eu trin mor gyflym a chyflawn â phosib. Gall cwyn gyrraedd drwy wefan, dros y ffôn, drwy'r Wifren Gwylwyr neu drwy'r post.
- 10.2 Os bydd cwmni cynhyrchu yn derbyn unrhyw gŵyn, sylw neu ymholiad ar fater gwleidyddol gan unigolyn, plaid neu sefydliad yn ymwneud â rhaglen neu wasanaeth S4C, disgwylir iddynt ei anfon yn syth at:  
Elin Morris, Cyfarwyddwr Corfforaethol a Masnachol, S4C, Parc Tŷ Glas, Llanisien, Caerdydd, CF14 5DU (02920 741479; [elin.morris@s4c.cymru](mailto:elin.morris@s4c.cymru)) yn hytrach na cheisio ei ateb eu hunain.